

## Morning Dogri (NSD) National News Bulletin 24-05-2024

### आकाशवाणी

- लोकसभा दे कल होने आले 6में गेड़ दे चुनां लेई सब्बे तैआरियां मुकम्मल। इस गेड़ तैहत 6एं राज्यें ते दऊं केन्द्र शासत प्रदेशें दिएं कुल 58 संसदी सीटें लेई कल वोट पाए जांगन।
- लोकसभा दे 7में गेड़ ते खीरले गेड़ दे चुनां लेई प्रचार तेज होई गेआ ऐ। बक्ख-बक्ख सियासी पार्टिं दे बड्डे नेता जनसभा ते रैलियां करै करदे न।
- कंबोडिया च भारती राजदूती दफतर आस्सेआ धोखेबाज नियोक्ताएं थमां बचाए गेदे 60 भारती बसनीकें दा पैहला जत्था कल भारत परतोई आया ऐ।
- भारत दी पी.वी.सिंधु नै मलेशिया मास्टर्स बैडमिंटन प्रतियोगिता दे सैमीफाइनल च अपनी थाहर पक्की करी लैती ऐ।
- आईपीएल क्रिकेट च अज्ज दुए क्वालीफायर मकाबले च सन-राईजर्स हैदराबाद दा मकाबला राजस्थान रॉयल्स कन्नै होग। मैच संजा साढे 7 बजे थमां खेड्डेआ जाग।



### Campaigning

लोकसभा चुनां दे 6में गेड़ लेई मुक्की गेआ। इस गेड़ च 6एं राज्यें ते 2 केन्द्र शासत प्रदेशें दे 58 लोकसभा सीटें च शनिवार 25 मई गी वोट पाए जांगन। इंदे च बिहार दियां 8, हरियाणा दियां सारियां 10, जम्मू कश्मीर दी इक, ओडिशा दियां 6, झारखंड दियां 4, उत्तर प्रदेश दियां 14 ते पच्छिम बंगाल दियां 8 सीटां शामिल न। इनें 58 लोकसभा सीटें पर कुल 889 मेदवार मैदान च न। मतदान बडलै 7 बजे थमां लेइयै संजा 6 बजे तगर होग। बीजेपी दे वरिष्ठ नेता ते प्रधानमंत्री नरेन्द्र मोदी होरें कल हरियाणा दे महेन्द्रगढ़ च ते पंजाब दे पटियाला च रैलियां कीतियां। कांग्रेस नेता राहुल गांधी होरें बी कल हरियाणा दे महेन्द्रगढ़ च रैली कीती।

दिल्ली च बीजेपी दे मनोज तिवारी ते बांसुरी स्वराज, आम आदमी पार्टी दे सोमनाथ भारती ते कुलदीप कुमार ते कांग्रेस दे कन्येआ कुमार ते जे.पी.अग्रवाल मैदान च न। 1 करोड़ 50 लख कोला मते मतदाता इंदे भविक्ख दा फैसला करगंन।

<><><><><><>

## 7<sup>th</sup> Phase Campaigning

लोकसभा दे 7में ते खीरले गेड़ दे चुनां लेई प्रचार जोरें-शोरें जारी ऐ। बक्ख-बक्ख सियासी पाटिएं दे बड़डे नेता मतदाताएं गी अपने पक्ख च करने लेई देसै दे बक्ख-बक्ख हिस्सें च रैलियां ते रोड शो करै करदे न।

<><><><><><>

## PM

प्रधानमंत्री ते बीजेपी दे वरिष्ठ नेता नरेन्द्र मोदी होर अज्ज हिमाचल प्रदेश दे इक दिने दे दौरे पर होंगन। हिमाचल प्रदेश च बी चुनां प्रचार तेज होई गोआ ऐ। उत्थें लोकसभा चुनाएं दे 7में गेड़ ते विधानसभा दिएं 6एं सीटें दे उपचुनां लेई पैहली जून गी वोट पाए जाने न। बीजेपी ते कांग्रेस दे बी बड़डे नेता उत्थें जोरें-शोरें प्रचार करै करदे न। री मोदी होर अज्ज बडलै सिरमौर जिला सदर मुकाम दे नाहन च चौगान ग्राउंड च बीजेपी दी विजय संकलप रैली गी संबोधत करगंन। मगरा श्री मोदी होर मंडी दे पड्डल ग्राउंड च जनसभा दरान बी भाषण देंगन। दूई बक्खी कांग्रेस दे राष्ट्री अध्यक्ष मल्लिकार्जुन खरगे कल शिमला दे राहडु च इक रैली करगंन। कांग्रेस दे वरिष्ठ नेता राहुल गांधी होर औंदे बारे हमीरपुर संसदीय सीट लेई शिमला दे नाहन ते ऊना च चुनावी रैलियां करगंन।

<><><><><><>

## Amit Shah

बीजेपी दे वरिष्ठ नेता ते केन्द्री गृहमंत्री अमित शाह होर कल संजा लै पटना पुज्जे ते पार्टी दे वरिष्ठ नेता ते बिहार दे साबका उपमुखमंत्री सुशील कुमार मोदी हुंदे घर जाइयै उनेंगी श्रद्धांजलि दिक्ती। अज्ज श्री शाह होर अरहा संसदीय हल्के च जनसभा करगंन।



## UP Campaign

उत्तर प्रदेश च राजनैतिक दल 7में ते खीरले गेड़ लेई जोरे-शोरें कन्नै प्रचार करा'रदे न। बीजेपी दे राष्ट्रीय अध्यक्ष जे.पी.नड्डा होरें खुशीनगर, बल्लिआ ते सोनभद्र जिलें च ते मुखमंत्री योगी आदित्यनाथ होरें महाराजगंज, खुशी नगर, देओरिआ ते गोरखपुर च प्रचार कीता। कांग्रेस दे प्रवक्ता अभय दुबे ते पार्टी दे मीडिया इंचार्ज सी.पी.राय होरें पार्टी दे मेदवार अजय राय लेई वाराणसी च इक प्रेस कांफ्रेंस कीती।



## PM-Interview

प्रधानमंत्री ते भारतीय जनता पार्टी दे सीनियर लीडर नरेंद्र मोदी होरें आखेआ ऐ जे 2014 दे लोकसभा चुनाएं च भ्रष्टाचार ते 2019 च लाभार्थियों दा मुद्दा मुख हा ते 2024 आहले चुनाएं दा मुख मुद्दा विकसित भारत दा ऐ। अंग्रेजी इक्क अखबार कन्नै गल्ल कत्थ करदे होई उनें आखेआ जे देसै दी जनता इस लोकसभा चुनां गी महत्वै आहला मनदी ऐ की जे चुनां देसै दी आसें-मेदें दी रफ्तार कन्नै विकसित भारत दा लक्ष्य हासल करने लेई ऐ। श्री मोदी होरें दावा कीता जे इस बारी बी.एम.बी.ए. गी उनें वोटरें दा समर्थन थोग जिनें पिछले लोकसभा चुनाएं च समर्थन दिक्ता हा। प्रधानमंत्री होरें गलाया जे इस बारी दे लोकसभा चुनां च भ्रष्टाचार बरोधी ते लाभार्थी मतदाता उंदे कन्नै न। उनें गलाया जे भारत दे तेजिया कन्नै विकास दी तांग रखने आहला वर्ग उनेंगी ते भाजपा गी समर्थन देआ रदा ऐ। उनें गलाया जे बैंकिंग, प्रत्यक्ष विदेशी निवेश, नियमें दी अमलावरी, कारपोरेट टैक्स, इंकम टैक्स ते मौद्रिक नीति च सुधारें दे नतीजें च हुन भारत दुनिया दी 5मीं सब्बनें शा बड्डी अर्थ बवस्था बनी गेदा ऐ।



## Combdia

कंबोडिया च भारती दूतावास आस्सेआ धोखेबाज नियोक्ताएं थमां बचाए गेदे 60 भारती बसनीकें दा पैहला जत्था कल भारत परतोई आया। सोशल मीडिया दी इक पोस्ट च नोम-पेन च भारती राजदूती दफतरै च कंबोडिया दे ऐहलकारें दा उंदी मदाद ते समर्थन लेई धन्नबाद कीता। उंदी मदाद ते समर्थन लेई धन्नबाद कीता। कंबोडिया दे अधिकारिणं धोखाघड़ी आले रोजगार दे 60 पीड़ितें गी घर परतोने च मदाद कीती ते कनूनी कागजी कारवाई च बी उंदी मदद कीती।



## Russia-US

रूस दे राष्ट्रपति ब्लादीमिर पुतिन नै देसै च अमरीकी संपत्तिएं गी जब्त करने दे आदेश उप्पर दस्तखत कीते। एह फैसला अमरीका च रूस दी संपत्तिएं गी जब्त करने दी आशंका ते परते च लैता गेआ। रूस सरकार दा विशेष आयोग रूस च अमरीका दी चल-अचल संपत्तिएं, शेयरें ते अन्य संपत्तिएं दी पंछान करग। इसदे कोला पैहले अमरीकी राष्ट्रपति जो बाइडेन होरें अप्रैल च इक कनून उप्पर दस्तखत कीते हे। जेह्दे तैह्त प्रशासन गी अमरीका च रूस दी तकरीबन 5 अरब डॉलर दिएं संपत्तिएं गी जब्त करने दा अधिकार दित्ता गेआ हा।



## Kolkata OBC

कलकत्ता उच्च न्यायलय नै 2010 कोला लेइयै पच्छम बंगाल च अन्य पिछड़ा वर्ग-ओबीसी दे सारे प्रमाण पत्रें गी रद्द करी दित्ता ऐ। ओबीसी प्रमाण पत्रें गी जारी करने दी प्रक्रिया गी चुनौती देने आली याचिका उप्पर उच्च न्यायलय दी खंडपीठ नै 2010 दे बाद बनाए गेदे ओबीसी प्रमाण पत्रें गी गैर कनूनी दस्सेआ ऐ। न्यायलय नै एह साफ कीता ऐ जेह्दे लोक एहदा लाह चुक्कियै कम्म करा'रदे न, उंदी सेवा इस फैसले कन्नै प्रभावत नेई होग।



## Delhi-Lok Sabha Seat

दिल्ली दिएं 7एं लोकसभा सीटें लेई 25 मई गी वोट पाए जांगन। बक्खरे—बक्खरे राजनैतिक दल जनसभाएं, रैलिएं ते रोड शो कन्नै प्रचार कीता। साढ़े संवाददाता होरें दस्सेआ जे बीजेपी दे वरिष्ठ नेता राजनाथ सिंह, पीयूष गोयल, स्मृति ईरानी ते उताखंड ते राजस्थान दे मुखमंत्रिएं बी जनसभा ते रोड शो कीते। कांग्रेस दे वरिष्ठ नेता राहुल गांधी होरें मंगोलपुरी ते सीणापुर च रैलियां कीतियां ते आम आदमी पार्टी दे नेताएं बी रोड शो कीते।



## CDS Cyber

रक्षा अमले दे प्रमुख जनरल अनिल चौहान होरें भारत दिएं साइबर रक्षा छमताएं गी होर बी मजबूत करने दी लोड़ पर जोर पाया ऐ। जनरल चौहान होरें कल नमीं दिल्ली च “एक्सरमाइज साइबर सुरक्षा 2024” विषे पर लोआए गेदे कार्यक्रम च हिस्सा लैंदे होई सब्बने सरबंधत लोकें गी आपुं च तालमाल रखने पर जोर भरेआ ते उभरा करदे साइबर खतरे कन्नै निबड़ने लेई इक सैह्योगी वातावरण गी बढ़ावा देने आली पैह्ल दी सराहना कीती। रक्षा मंत्रालय नै आखेआ ऐ जे व्यापक साइबर रक्षा अभ्यास 20 थमां 24 मई तगर रक्षा साइबर अजेंसी आस्सेआ आयोजित कीता जा’रदा ऐ। एहूदा मकसद सब्बै साइबर सुरक्षा संगठनें गी साइबर रक्षा क्षमता गी विकसित करना ते सब्बने हितधारकें बश्कार तालमेल गी बढ़ावा देना ऐ।



## Maharashtra Blast

महाराष्ट्र दे ठाणे जिले च औद्योगिक खेत्तर डोंबीवली च धमाका होई जाने करी 9 लोकें दी मौत होई गई ते 56 जनें घायल होई गेदे न। एहू घटना कल होई जिसलै रसैन तैआर करने आली इक कंपनी दे बॉयलर च धमाके परैंत उत्थें अगग लगी गई।

मुख्यमंत्री एकनाथ शिंदे होरें धमाके च मारे गेदे लोकें दे परोआरें लेई 5-5 लक्ख रुपें दी माली मदाद दा ऐलान कीता ऐ। मामले दी जांच जारी ऐ।

<><><><><><>

## Badminton

भारत दी पी.वी.सिंधु क्वालालम्पुर च मलेशिया मास्टर्स दे महिला सिंगल्स सैमीफाइनल च पुज्जी गेइयां न। दऊं बारी ओलंपिक दा तगमा जित्तने आली सिंधु होरें अज्ज बडलै क्वार्टर फाइनल मकाबले च ची नदी हान यूई गी 21-13, 14-21 ते 21-12 कन्नै हराई दित्ता। दुए क्वार्टर फाइनल च अस्मिता चलिहा दा मकाबला ची नदी झाग ई मान कन्नै होग। होरने श्रेणिं च राउंड-16 च भारत दा अभियान मुक्की गेआ ऐ। मर्दे दे सिंगल्स च किरण जार्ज गी मलेशिया दे जी जिया ली दे हत्था हार दा सामना करना पेआ। मर्दे दे डबल्स च साई प्रतीक ते कृष्ण प्रसाद गरागा दी जोड़ी चीन दे रेन जिया-नग्यु ते जी तिं ग हे थमां हारी गेई। महिलाएं दे डबल्स च त्रीसा जोली ते गायत्री गोपीचंद गी ताईवान दी सुंग शुओ युन ते चेन यू थमां हार दा सामना करना पेआ।

<><><><><><>

## IPL

अज्ज आईपीएल क्रिकेट च सनराईजर्स हैदराबाद ते राजस्थान रॉयल्स कन्नै चेन्नई दे एम.ए. चिंदबरम स्टेडियम च दुआ क्वालीफायर मैच खेड्डेआ जाग। मैच भारती समें मताबक संजा साढे 7 बजे शुरू होग। कोलकाता नाईट राईडर्स सनराईजर्स हैदराबाद गी हराइयै पैहले गै फाइनल च पुज्जी गेदा ऐ।

<><><><><><>